

Meeqqat angerlarsimaffiup avataanut inissitaasut angajoqqaarsiaanni atugarisat nakkutigineqartarnissaat ersarinneruleqqullugu tassungalu ilanngullugu meeqqat angerlarsimaffiup avataanut inissitaasut pillugit iliuusissanut pilersaarusiortoqartalernissaata qulakkeerneqarnissaa anguniarlugu siunnersuuteqaqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Astrid Fleischer Rex, Demokraatit)

Akissuteqaat

(Ilaqutariinnermut, Kultureqarnermut, Ilageeqarnermut Naligiissitaanermullu Naalakkersuisoq)

Siullermeerinnineq

Aalajangiiffigisassatut siunnersuutinnut qujanaq, tassani meeqqat inuusuttullu ilaqutariinnut paarsisartunut inissinneqartarnerat pineqarpoq.

Naalakkersuisut aallarniutigalugu paasissutissiisutigissavaat UPA 2012-imi inatsisissatut siunnersuummik saqqummiussinissaq siunertaralugu meeqqanut inuusuttunullu ikiorsiisarneq pillugu inatsisip nutaap piareersarneqarnera maanna ingerlanneqarmat. Inatsimmi nutaami ilaqutariinnut paarsisartunut tunngasuni maleruaqqusat pitsaanerusut pingaartinneqassallutik.

Meeqqat inuusuttullu ilaqutariinni paarsisartuni inissinneqarsimasut nakkutilliivigineqarnissaannut pisussaaffiup ersarissarneqarnissaa pisariaqartinneqartoq kiisalu iliuusissanut pilersaarutininik nutartikkanik ingerlaavartumik suliarinnittoqartarnissaata qulakkeerneqarnissaa pisariaqartinneqartoq Naalakkersuisut siunnersuuteqartoq isumaqatigaat.

Nakkutilliinissamik pisussaaffik inatsisissami pitsaanerusumik maleruagassiuunneqassaaq, taamaalilluni meeqqat inuusuttullu inissinneqarsimasut toqqissisimasumik atugaqarnissaat qulakkeerneqarluni. Inatsisissap nutaap piareersarneqarnerani ilaatigut ilaqutariinnut paarsisunut nakkutilliilluni takuniaasarnikkut, meeqqanik inissinneqarsimasunik oqaloqatiginnittarnikkut, kommunimi ingerlatsivimmut nalunaarusiortarnikkut il.il. nakkutilliinerup qanoq pitsaanerpaamik qulakkeerneqarsinnaanera isumaliutigineqarpoq.

Ilaqutariit paarsisartut suliaminnik isumaginnissinnaanerat nukittorsarniarlugu ilaqutariit paarsisartut kiisalu kommunini ilaqutariinnut paarsisartunut tunngasuni sulianik ingerlatsisut pikkorissartinneqarnissaannut ukiuni 2009, 2010 aammalu 2011-mi aningaasanut inatsisini aningaasanik immikkoortitsisoqarpoq. Piffissami ukiuni pingasuni tassani ilaqutariit paarsisartut najukkani pikkorissartinneqartarput. Taamaalilluni ilaqutariinnut paarsisartunut pikkorissartitsinerit agguaqatigiisillugu aqqaneq marluk ingerlanneqarput, tunngaviummik pikkorissartitsisoqarluni malitsigisaanillu pikkorissartitsisoqarluni. Pikkorissartut pikkorissartitsinerinik taakkuninnga naliliinerminni oqaatigaat pikkorissartitsinerit pissarsivigilluarneqartut aammalu meeqqat paarineqartut eqqarsaatigalugit suliap pitsaanerpaamik ingerlanneqarnissaanut pikkorissartitsinerit pisariaqartut.

Meeqqat ilaqutariinnut inissinneqarsimasut pitsaasumik atugaqarnissaat qulakkeerniarlugu tunngavissat ilaat tassaavoq ilaqutariit paarsisartut meeqqat sapinngisamik pitsaanerpaamik atugaqartinniarlugit isumaginninnissamut piginnaanngorsartinneqarnissaat. Taamaattumik ilaqutariittut paarsisartutut ilinniartitaaneq RUGO nunatsinni pissutsinut naleqqussagaq maanna ineriartortinneqarpoq. RUGO-p naalisarneqarnera tassaavoq Rekruttering, Uddannelse, Godkendelse og Organisation (inuttassarsiuineq, ilinniartitaaneq, akuerisaaneq aqqissuussinerlu) aammalu pikkorissartitsinerit taamaattut Danmarkimi angusaqarfiullu arput.

Nunatsinni RUGO aallaavigalugu periusissamik ineriartortitsinissaq pitsaasutut Naalakkersuisunit isigineqarpoq, tassami angajoqqaarsiat meeqqamik paarsassaminnik siullermik tigusinnginnerminni piginnaanngorsarneqarnissaat kiisalu ingerlaavartumik pikkorissartittarnissaat qulakkiissallugu pingaaruteqarmat.

RUGO-mi pikkorissartitsinerni pingaarnertut anguniarneqartut tassaapput ilaqutariit paarsisartut meeqqamik paasinninnissaannut aammalu angajoqqaanik isumaginninnermilu oqartussaasunik suleqateqarsinnaanermik tunngavissinneqarnissaat, ilaqutariittut paarsisartutut tunngavissanik tamatumalu imarisaanik ilaqutariit paarsisartut paasitinnissaat, ilaqutariit paarsisartut namminneq ilaqutariittut nukittussutsiminnik sanngiiffimminnillu sulissutiginninnissamut periarfissinnissaat, taamaalillutillu suliassap isumaginissaanut piareersimanerulernissaat, ilaqutariit paarsisartut paarsisartoqatiminnik sulihamillu assinganik ingerlataqartunut attaveqalernissaminnut periarfissinnissaat kiisalu paarsinerup ajalusooratarsinnaanerata annikillisarneqarnissaa.

Ilaqutariinni paarsisartunut tunngasut misissorneqarnerannut atatillugu taama misissuisoqarnissaanik neqeroorutiniq arlalinnik Naalakkersuisut pissarsipput, sukumiisumillu nalilersuereerlutik aalajangerput suliffeqarfik ulloq unnuarlu paaqqinnittarfinnik misissuititsinermi atorneqartoq matumani aamma suliakkerniarlugu. Misissuititsineq piaartumik aallartinneqassaaq 2012-imilu naammassinissaa ilimagineqarluni. Misissuinermini ilaatinneqassapput meeqqat paarineqartut ilaqutariillu paarsisartut kiisalu kommunini paarsisartunut inissiisarnermik suleriaasiat.

Meeqqat ilaqutariinni paarsisartuni inissinneqarsimasut pitsaanerusumik nakkutilliivigineqarnissaat pillugu inatsimmik nutaamik kiisalu meeqqanut taakkununga iliuusissatut pilersaarutiniq Naalakkersuisut piareersaalereermata aalajangiiffigisassatut siunnersuut una akuerineqassasoq Naalakkersuisunit inassutigineqarpoq.